



Наведи телефон

Лүимә СЭрипос

25.03.2021
№ 6 (1240)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



Л. Теткина вэрүм хури

Сургутский район Русскинская павылт сáлың мáхум кассыт.
Ты каснэ вáрмáль урыл 6 лóпсыт ловиньтэн.

**Ты
номерт
ловиньтэн:**

Самбиндалов
рүтыт кисхатэгыт

▶ 2

Сосса мирыт акв
нэпакн хансавет

▶ 4

Сáлыл кассыт

▶ 6

Áтям сáлыт
пусмалтас

▶ 8

Ялпың мánэ
ўргалым ðньщиянэ

▶ 10-11

Хум лáвыс – тўяг
вас пáтлуптаңкв
ат рóви

▶ 14

«Мáк нётнэ áги»
спектакль
суссылтаве

▶ 16

Сәв муй махум тыг вос ёхталэгыт

Россият ос мот хон матт олнэ мирыт мән округувн вәтихал вос ёхталэгыт, тыт сәв рупата вәраве. Гостиница-колытт рупитан хөтпат йильпи щирыл рупитаңкве ань ханищтавет.

Ты урыл Евгения Вторушина ос Владислава Вишневская «Югра» нампа ляххал тотнэ колт потыртасыг. Нэг туризм-вәрмалъ щирыл рупитэг.

Евгения Вторушина ләвыс, гостиница-колытт рупитан хөтпат муй махум ёт эрнэ щирыл вос рупитэгыт, тымәгсыл ты ханищтап вәрсыт.

Овыл щёс тән вәт сәг-рапнал этпост махум акван-атыгласаныл. Тонт

горничныит, администраторыт ос официантыт эрнэ щирыл рупитаңкве ханищтасаныл. Ань гостиница-колыт кұщаит ёт рупитаңкве тах патэгыт.

Овыл ханищтап мән-поль этпос 26 хөталэт Ханты-Мансийск үст тах вәраве. Сургут үст олнэ махум мәгсыл тамле хөнтхатыглап ос щёпитэгыт. Акв группат лов элумхөлас ханищтэгыт, мотаныт ищхйпың ут хосыт тәнаныл хүнтлуңкве

патэгыт. Ты ханищтапн кәсың кәсащан элумхөлас ялуңкве вәрми ос олн ойтуңкве щар ат эри.

Мән округувн сәв мир ёхталәлы ман әти, та урыл Владислава Вишневская потыртас. Ань махум муйлым ат яласэгыт. Ты элы-пәлт 2019 тәл сыс 580 сөтыра элумхөлас тыг ёхталас. Ты тәрвигың пора хунь ювле хульты, махум мә янытыл яласаңкве бста овылтахтэгыт. Тән сосса мирыт блупсал сака пұмщалахтэгыт, ос тыг тах ёхталэгыт. Муй хөтпат Сургутский ос Нижневартовский районыгт пёс йис мат олнэ ханты ос ёрн щёмьят палт тотыглавет.

Яныгпөль этпос 10 хөталэт мә янытыл олнэ махум ёсал хәйтуңкве Ханты-Мансийск үсн тах вөвыглавет. Рушләтңылты касыл «Югорский лыжный марафон» ләваве. Касыл вәрыглаңкве кұщаит ань щёпитахтэгыт.

Кәсың тәл Нефтеюганский район «Сказка» үщ-лахтын мән мәнхәпыл касуңкве сосса махум акван-атхатыглэгыт. Сәв мир касыл сунсуңкве тув ёхталы.

Ты туй кұщаит касыл щёпитаңкве ос муй махум тув вөвыглаңкве таңхэгыт.

Людмила ТЕТКИНА

Самбиндалов рұтыт кисхатэгыт

Ханты-Мансийск үст «Торум Маа» нампа музейт Майя Ефимовна Макарова рупиты. Ты мәнъщи нэ Хальүс район Восыңтүр пәвылт самын патыс, тот яныгмас. Тав омагә пәлыл рұтанэ Самбиндаловыт, тымәгыс ань нэ ты бпарич наме щирыл ляпа рұтанэ кинсы.

Та этпост акв мәнъщи хум Олег Саввич Самбиндалов яныг үсувн ёхталас. Тән тыт акван-хөнтхатыгләлсыг, рұтанән урыл потыртасыг. Майя Ефимовна анёкватә Аксинья Васильевна Самбиндалова, Хальүс район Квайкья пәвылныл олыс. Та пәвыл хосат әтим, мәтә нирыл лап-яныгмавес. Пёс порат тот сәв Самбиндалов махум олсыт.

Майя омаге-әтяге училище әсламән ю-пәлт Хөрыңпәвылн рұ-

питаңкве кётыглавесыг, тән тот китахкем тәл олсыг. Та порат анёкватә Аксинья Васильевна мис-экватә тотым Хөрыңпәвылн ләглыл ёмыс. Тав лёңхыт ёмщакв вәсанэ, ул хотыл тувыл олыс.

Олег Саввич ос такви рұтанэ урыл мощ потыртас. Опатэ Дмитрий Савельевич Самбиндалов наме олыс. Тав пёс йис тагыл вөраим, хұл алышлым ос такви сәлыяна үрим нёрыт ляпат яласас. Ань Олег омаге-әтяге ос әпщиянэ ёт тот вөраим олэгыт.



О. Самбиндалов ос М. Макарова

Майя Ефимовна «ВКонтакте» интернет лөпсыт Самбиндаловыт махум мәгыс ань группа щёпиты. Округувт олнэ Самбиндаловыт пуссын тув нётумтыяна тах ос наманыл акв нәпакн тах хансыяна.

Тән тув хурит кетуңкве ос тәнки рұтаныл урыл тот потыртаңкве халанылт вос вәрмысыт. Тыщир рұтыт хөнтуңкве ос тәра-паттуңкве кұпнитнуве.

Николай МЕРОВ

Рүпитан колыт мәгыс ляххал

Мән округут «№89-оз»
нампә сәккон хансым блы
– «О гарантиях трудовой занятости
инвалидов в ХМАО-Югре», тав 2004 тәл
яныгпөль этпос 23 хөталэт пирмайтавес.

Рүпитан колт 35 арыг-кем хөтпа те рүпиты, тән «квотаг» ләвнэ тәлал нәтавет. «Квота» - ты сакватахтам манос агмың-мосың хөтпа рүпатал минэ вәрмалы. Тән танти палтаныл тамле хөтпа рүпитан виңкв ат те вөрмәгыт, тонт олн мөт организациян вос ойтәгыт, та колт акв-тит рүпитан мә вос щөпитаве.

Тувыл кәсың этпос центр занятости колн тамле латың вос тәтәгыт:
– арыг рүпитан мә бньщөгыт ман әти;

– кәсың этпос 5 хөталэ мус отчет вос хансәгыт,

хөтпа рүпитаңкв висаныл мән әти. Рүпата минэ департамент лөпсәт «работодателям» нампә мәт ләтңаныл тув өс вос тәтыяныл.

Ты сәкконт хансым блы, кәсың күщай такви рүпитан колэ мәгсыл «квота» винэ урыл пүмшалахтуңкв вөрми.

Сакватахтам манос агмың-мосың хөтпа рүпитан ат винэ күщайт 5-10 сөтыра сәвит солкөви штраф-олныл пинавет. Ты тәла «ч.1 ст. 5.42 КоАП» нампә РФ сәккон щирыл вәраве.

Рүпитан колыт субсидия-олныл мивет

Кәсың рүпитан кол ань округ миркол пәлыл субсидия-олныл миве, тән танти коланыл аквит сакватахтам ос агмың-мосың хөтпа мәгыс рүпитан мә вос щөпитәгыт ос рүпитаңкв тув вос выганыл.

Ты мәхумн нәтнэ мәгыс округ миркол күщайт хүлтнэ нәпак хассыт, тот ты урыл тох хансым блы. Хоты кол танти палтаныл тамле элумхөлас рүпитаңкв выганыл те, тән 72 сөтыра 690 солкөвил мивет. Тувыл агмың-мосың хөтпан нәтнэ мәгыс ос 7 сөтыра 365 солкөвил кәсың этпос тәставет. Ты олныт округ мирколныл ойтает.

Ты рүпата емащакв вос

мины, центр занятости колт рүпитан мәхум ищхыпың мәт рүпата минэ округ департамент лөпсәт ляххал хансәгыт. Тувыл хоты рүпитан кол сакватахтам хөтпа танти палтаныл выгыт те, тән ты нәпакыт щөпитәгыт ос тув тәтыяныл:

1. Заявление-нәпак

2. Справка хансәгыт, тот хансым вос блы – тән әрнта ат бньщөгыт, округ бюджетныл вим олныт пуссын ювле ойтсаныл.

Хотыют ты вәрмалы урыл сәвнув вәңкв те таңхи, тән ты телефон хосыт вос свонитәгыт ос титыглахтәгыт: (3476) 32-05-15.

Ханты-Мансийск
үст блнэ центр занятости
колныл тәтым ляххал
мәньщи ләтңыл **Валентина**
ХОЗУМОВА хансытә

Нә хөтпа бщнэ маснут юнтәгыт

Хальүс районт блнэ нә хөтпат 2015
тәл пәсныл кәсың тәл мәньполь
этпост акван-атхатыгләгыт ос пуссын
аквьет мәщтырләгыт. Мөлты тәл тән Ягрим
пәвылн ехталасыт ос сакың нярәт юнтсыт.

Ханищтап щөпитан тыглаве. Ты рүпата ань
мәгсыл Хальүс район таимәгсыл вәрыглаве,
миркол пәлныл олн тәс- Хальүс районт блнэ нә



г. Кондина вәрүм хури
2020 тәлт

хөтпат мәньщи, ханты маснут эрнэ щирыл, пәс хольт вос юнтәгыт ос мәньлат хөтпат аквта щирыл юнсхатуңкве вос ханищтыяныл.

Ты вәрмалы палт пуңк-тотым **Любовь Кашлатова** блы. Ханты нә сәв тәл «Югра лылыеп» организацият рүпитас, ань ос сосса мәхум олупсаныл нөх-вөрмалтым сәв эрнэ рүпата вәри.

Любовь Васильевна ләвыс: «Мән кәсың тәл матыр вәруңкве акван-атхатыгләв, ты элы-пәлт супыт, нуй сахит юнтсүв, акв порат турлөпсыт сакныл хартсүв, мөлты тәл совныл ләгыл маснут «ниры» юнтсүв. Щар бвыл ханищтапув Тәк пәвылт блыс, тот сәсныл хусапыт

юнтуңкве ханищтахтасүв.

Мән кәсың тәл мәньполь этпост акван-атхатыгласүв. Ань корона-вирус агм мәгсыл сәв мирн акван-атхатуңкве ат рөви. Ты тәл мәхманув таквсы оигпан элы-пәлт Хальүсн мащтырлаңкв тах вөвыглыянүв. Тонт мән вәтаңтөр юнтуңкве патэв».

Ты ханищтап 2025 тәл мус рүпитаңкве паты. Семинараныл пуссын хунь әстәгыт, акв яныг суссылтап щөпитаве, ты тәлыт сыс вәрүм, юнтум пормасаныл тот тах суссылтыяныл. Нә хөтпа маснэ пормасыт тот янытәт кәсалаңкве рөви.

Людмила ТЕТКИНА

Сосса мирыт акв нэпакн хансавет

Тāl котиль этпосныл Россия янытыл олнэ мощцаг хультум сосса мирыт пуссын акв нэпакн хансуңкве патвэсыт. Ты вәрмалы урыл яныг кұщай хум Михаил Мишустин мөлты тал сұқыр этпост хұлтнэ латың хансыс.

Россия федеральный агентство-колт рұпитан хөтпат лүй мāt янытыл олнэ мāхум пуссын акв нэпакн ань хансыяныл. Ты рұпата тән 2021 тал сыс тах вәрияныл. Элумхōлас наме тув вос хансавет, такви нэпаканэ ос заявление кетуңкве ань эри. Сосса община т ты рұпата вәруңкве ос вөрмөгыт.

Хөнтаң район мирколт ты рұпата Антон Балин вәри. Тав таи потыртас:

– Мән мәнщи, ханты ос ёрн мāхманув заявление-нэпак федеральный агентство-колн кетуңкве ос лāvиянүв. Хөнтаң районт олнэ сосса мир ты вәрмалы урыл акваг пұмщалахтэгыт.

Тәнанылн мән потыртэв, хумус эрнэ щирыл заявление-нэпак хансуңкве ос Москва үсн хоты адресын пищма кетуңкве эри. Ты элы-пәлт мән мәнки ты агентство-колн свонитасүв ос ты рұпата хумус вәруңкв, китыглахтасүв.

Төнт лāvесүв, сосса мāхманув заявление вос хансэгыт ос эрнэ нэпаканыл ос кетэгыт. Ты рұпата мұсхалыг ат ке вәрөгыт, пищманыл ювле ёхтэгыт, төнт реестр-нэпакн ат хансавет.

Ань кұщайт номсэгыт, ты рұпата МФЦ-колыт щирыл щёпитаңкв, төнт сосса мирыт моляхнув пуссын тув хансавет ос олн ойтуңкве тән ат патэгыт. Хөтпа такви нам-

Советский район мирколт рұпитан нэ Елена Гильманова тот олнэ сосса мир ёт рұпиты. Тав лāвыс:

– Мән палтув туп кит элумхōласыг ёхталасыг ос ты вәрмалы урыл китыглахтасыг. Мāхманув реестр-нэпак урыл мән акваг кос потыртыянув.

Төват лāvөгыт, тәнки намнэпаканыл хащтāl мән кетуңкве пилэгыт. Ос нотариус-хөтпа палт ялнэ мāгсыл олн ойтуңкве эри. Тәнки нэпаканыл тув кетуңкве сака ат кәсәцөгыт. Ань мән Советский үст библиотека-колн сосса мāхманув вōвыглаңкве патыянув, тот заявление хансуңкве тах нётыянув.

нэпаканэ манос копиятэ тув вос кёты. Нас тох кетуңкве ос ат рōви, тот нотариус-хөтпан хасхатуңкве эри. Ос тот хасхатнэ мāгсыл тав олн выг.

МФЦ-колт рұпитан мāхум олнтāl ты рұпата вәрөгыт. Ань төва мāхманув үрхатэгыт, хунь нэпаканыл тот пирмайтаңкве овылтавет. Мән палтув сāvнүв яныг мāхум свонитэгыт ос ёхталэгыт, мāньлат хөтпат нас үрхатэгыт.

Мәнщи, ханты ос ёрн мāхманув тув хасхатуңкве ос эри. Округ мирколт ищхйпың лōпс оныщи – <https://kmns.admhmao.ru/>, хоты нэпакыт акваг-атуңкве ос хоталь кетуңкве эри, тот пуссын хансым олы. Тувыл кәсың районт ос яныг үст мирколытыт ты рұпата вәрнэ хөтпат ань олэгыт. Тән палтаныл мāхум китыглахтуңкве вөрмөгыт.



М.А. Алгадьева Полина агитэ ёт пōслым олы

Советский район кәсың мән пāvылквет мирколт кұщайт ты хосыт рұпитаңкве ань лāvиянүв. Пāvлың мир нэпаканыл Москва үсн вос кётыяныл.

«Югра лылыёп» общественный организация мāхум ты хосыт ос рұпитэгыт. Ты организацият кұщай нэ Людмила Алфёрова лāвыс:

– Мән ань ос сосса мāхманув ты реестр-нэпак урыл акваг китыглахтэгыт, маньр мāгсыл тән тув хансавет. Мән акваг лāvиянүв, Россият олнэ мощцаг хультум мирыт тох пуссын ёмащакв ловиньтавет.

Ань Россият олнэ мирыт паспорт-нэпаканылт национальность ат хансавет. Ты йист сосса мāхум сāvсыр нётмил вōвим сāv нэпакыт акваг-атуңкве лāвавет.

Мощцаг хультум мирыт пуссын тув хунь хансавет, мирколт рұпитан мāхум, сāv мōт мātт рұпитан кұщайт ты нэпак тәнки тот сунсуңкве патэгыт.

Ань Россият 47 сосса мирыт олэгыт, пуссын аквагёт тыи 300 сōтыра элумхōлас. Тән лүимāt ос Дальний Востокыт вōраим, сāлы үрим, хұл алыщлым ос тәнки пёс йис вәрмалыяныл элалы тотым олэгыт.

Сосса мир ань мощца хультыс, Россият тән үргалым оныщавет, сākконытыл пирмайтавет ос сāvсыр щирыл нёттавет. Кұщайтн ёмащакв вāңкве эри, манасāvит сосса мирыт ань Россият олэгыт, таимāгсыл тамле реестр-нэпак ты вәрыс.

Лёккарыт Элумхōлас мōт сымыл пēнтсаныл



Ишхйпын мāt вим хуринг



М. Скоробогатов, Е. Кутефа, А. Добровольский, С. Стефанов

Ты тāl мāньполь Этпос лов хōталēt Ханты-Мансийск ўс округ пўльницат рўпитан лёккарыт сым агм оньщум хōтпа мōт сымыл пēнтсаныл.

Тамле операция округт лёккарыт овыл щēs вāрсаныл. Ты вāрмаль хумус минас, ань лёккарыт ты урыл потыртасыт.

Ты кастыл ляххал тотнэ колн мир пусмалтан округ департамент кўщай хум Алексей Добровольский, округ пўльницат яныг лёккарыг рўпитан нэ Елена Кутефа, сым пусмалтан хум Сергей Стефанов ос

сым пусмалтан мāt кўщайг рўпитан хум Михаил Скоробогатов ёхталасыт.

*Сым лёккар хум **Сергей Стефанов** лāvме щирыл, пуссын аквьёт хўрумхуйплов яныг ос мāнь лёккарыт сым пēнтуңкве нётсыт. Тāн нила щēs арыгтем аквьёт рўпитасыт. Операция ёмщакв минас, нэ-матыр тārвит вāрмаль ат ёмталас.*

Сым пēнтым порат округ лёккаранув академик В.И. Шумаков намыл маим пўльницат рўпитан лёккарыт ёт ишхйпын ут хосыт потыртасыт. Тāн мāн лёккаранув хўлтыгласаныл. Ты вāрмаль астылым юи-пāлт, операциял вāрим хōтпа сые тāра ёмщакв рўпитаңкве патыс. Ты элумхōлас хўрум сāt сис пўльницат уральтым ошвес, тувыл юв тāртвес. Ань тав пўльницан уральтахтуңкве такви ёхталы.

Сергей Стефанов лā-

выс: «Тамле операция вāруңкве сака тārвитың, хунь хōтпа искусственный кровообращение палт кēлп-тārсанэ вāравет, тōнт агмың сые хот-яктаве. Та юи-пāлт ювле ёхнэ лēңх атим, йильпи сым ёмщакв вос рўпитас, таве мўсхал щирыл тув юнтуңкве эри».

Михаил Скоробогатов ос тох потыртас:

– Сым пēнтнэ вāрмальн мāн кит тāl щēпитахтасўв. Ты операциян пуссын аквьёт китахкем хōтал ёмщакв щēпитахтасўв. Якытлахтын кол кйвырт хўрумхуйплов лёккар рўпитасыт. Ты коньпал хōтпаккем мōт сāvсыр мāнь лёккарыт ос нётмил вāрсыт. Пуссын акван-нётхатым рўпатав мўсхал щирыл ты вāрыслўв.

*Округ пўльницат яныг лёккарыг оlnэ нэ **Елена Кутефа** лёккарыт пуссын янытласанэ. Тав лāvмыс:*

– Тамле тārвитың операция ёмщакв вāрвес. Ань тох лāvуңкве рōви, Югра мāvт мир пусмалтан


вāрмаль ёмщакв элалы олы. Лёккаранув тāнки рўпатаныл мāk вāганыл ос эрнэ щирыл вāрияныл.

*Мир пусмалтан округ департаментыт кўщай хум **Алексей Добровольский** лāvмыс:*

– Ань округувт яныг-сāt атпан элумхōлас тārвитың сым агм оньщēгыт. Тāн ўрхатэгыт, хунь ос пус сымыл пēнтавет. Ань мощёртын Сургут ўст ос акв тамле пўльница пўнсаве тах.

Округувт нелолов пўльницат рўпитэгыт, тот ушты атимыг ёмтум хōтпат сыманыл виңкве вёрмавет. Ты сымыт агмың хōтпат палт ты юнтавет. Ювле хультым тāлытт округ пўльницавт пус сāңкв ахвтасыт ос пус мāйтыт мōт элумхōласн ўнттувёсыт. Ань мāн мāvт овыл щēs ты тāl элумхōлас сые ты пēнтвес. Округувт мир пусмалтан вāрмаль ёмщакв элалы мины.

Николай МЕРОВ





Нэг-хумыг касуңкве ёмёр



Салың хум нуйхаты

Салыл кассыт

Сургутский районт ёлнэ ханты махум
Русскинская павылын маньполь
этпос 20 щислат каснэ вармалын акван-
атхатыгласыт.

Тот ёлнэ сасса махум
1974 тал пасныл касың
тал муйлуңкве тув во-
выглавет. Руц латңыл ты
вармалы «Слёт олене-
водов, рыбаков и охот-
ников» намаим ёлы.

Ханты щёмьят пёс йис
щирыл тот ёлэгыт, салы
урёгыт, вораёгыт ос хул
алыщлэгыт. Танки хала-
нылт туп щань латңыл
потыртэгыт.

Махум салыл кассыт,

халанылт пёрщисыт,
сахил манос мольщаныл
масхатым хайтыгасыт.

Ань мощца салың хот-
пат касуңкве ёхталасыт.
Алпыл, лов щёс порат,
акван-атхатуңкве тан та
патсыт.

Ёвлэт 28 хум хотпат
салыл кассыт. Товат салы-
яныл такем молях нуй-
хатэгыт, мотаныт хайтуң-
кве щар ат таңхёгыт,
пёхан ёңхыгпёгыт.

Хум хотпат юи-палт 13
нэт салың суныл кассыт.
Тан халанылт товат ос эл
аты минасыт, салыяныл
ёс похын хотталь хайт-
сыт, финиш мус аты ёх-
тысыт.

Мёт касыл щирыл хум
хотпат мольщаныл, нэ
хотпат сахил масхатым
хайтсыт, ань хотьютаныл
финиш мус ёвлэт ёхтыгпи,
тав нёх та паты.

*Та мат ёлнэ ханты нэт
сахияныл сакыл хорам-
тыяныл, хансаныл сака
янгыт. Тан лавёгыт, акв нэ
сахитэ хорамтан магсыл
лов кила савит сак тув
юнтуңкве вёрми.*

Тамле маснутыл хай-
туңкве сака тэрвитуң.

Тувыл ос сунсуңкве хумус
сахил хайтыгтэгыт – тай
пумаш. Тох маньлат агит
ос пыгыт халанылт касэ-
гыт.

Сосса махум ёс акв
касылыл вэрыглавёсыт,
хотьют салыяныл ос
салың сунаныл нётнэг
хорамтыяныл, та хотпа
нёх та паты.

Аквта порат хум хот-
пат халанылт пёрщисыт,
мак ёр хотпа пёриясыт.
Ханты латың щирыл ка-
сыл «Нюл-тахли» лававе.

Ворт ёлнэ ханты махум
ты ялпың хоталт салы
нёвыль, хул, пил, паквсам
ос мот тэнут-пормасыт
тыналасыт. Муйлын ма-
хум салыл ос «Бураныл»
тотыгласаныл. Салың су-
ныл яласан магсыл олн
висыт, тыщирыл олн мощ
сёлсыт.

Кит ёрнкол тот тўцта-
лавёсыг, муйлын мир тот
атың салы исмитыл, пи-
лың нянил тыттувёсыт ос
щайл айтвёсыт.

*Ялпың хотал урыл ань
сав мир вэг, сасса махум
салыл хумус касэгыт,
Россия янытыл ос мот
хон маныл сав мир тув
ёхталалы. Ань муй махум
тув ат вёвыглавёсыт. Ты
тал ялпың хоталн туп
Сургут ос Когалым ўсыгт
ёлнэ акв сотыра арыгкем
элумхёлас ёхталасыт.*



В. Анямова ос Т. Бахтиярова



В. Шадрина

Людмила ТЕТКИНА

www.khanty-yasang.ru

Халанылт касуңкве яныг үсн ялсыт

Москва үст рётың юсвой этпос вāt нупыл хōт хōталныл вāt нупыл нёлолов хōтал мус щāнь лāтың ханищтан мāхум сапрāнияныл блыс. Таве Фонд национальных проблем образования РАНХиГС намаим колн вāрыглавес.

Тув Россия 18 сāvсыр мāныл нйврамыт ханищтан 36 хōтпа ёхталасыт. Мōлты тāлт ты мāхум тāнки халанылт всероссийский касылыт кассыт ос Президент пāлыл грант-олныл майвёсыт. Ань ос тāн элалыт тотнэ рупатаныл ос проектаныл бовылтыт потыртасыт.

Хурум хōтал сыс тот ханищтап блыс, тувыл ёнта пасан вātат щāнь лāтың ханищтан Концепция-нэпакн хансым вāрмалит тāра-паттысыт ос эрнэ лāтың хултысыт. Та юи-пāлт Ингушетия, Кабардино-Балкария, Марий Эл, Удмуртия, Хакасия, Чечня, Чувашия ос Лүймā мāнытныл ёхталам педагогыт нйврамыт хумус щāнь лātңыл пўмщалыяныл, ханищтыяныл – та щирыл тāнки халанылт мāщтырыг кассыт.

Округувныл хурум нэкет тув ялсыт - тыи Ханты-Мансийск үст «Лылың сōюм» колт рупитан нэ **Раиса Мартыновна Гаврильчик**, Касум пāвылт мāнь нйврамыт ханищтан нэ **Любовь Викторовна Захарова** ос Сургутский район Лямино пāвыл школат ханты лāтың ханищтан нэ **Галина Павловна Лаптева**.

Тāн пуссын округ касылытт блум порат мōт ханищтан хōтпат халт нōх-патыгласыт: Галина Лаптева - 2017 тāлт,

Любовь Захарова - 2019 тāлт, Раиса Гаврильчик - 2020 тāлт. Та юи-пāлт тāн Москван мōт мāt нōх-патум хōтпат ёт элалыт касуңкве кётыглавёсыт.

Ань ты порат тāнки вāрыглам манос хотты хōтпат щёпитālнэ рупатанылт маныр тэлат вāрсыт, ты бовылтыт тот потыртасыт ос мōт мўй мирыт тэланыл пўмщаланыл.

Раиса Гаврильчик РФ Общественный палатат ос Лүймā, Сибирь, Дальний Восток соссамырт ассоциация-коланылт «Культура народа в чемодане» нампa проект Москват суссылтас. Ты чемодан кйвырт мāньщи мāхум маснутаныл, пормасаныл акван-атым олэгыт ос



Мāньщи лāтың ханищтан нэ Р.М. Гаврильчик



Л.В. Захарова, Г.П. Лаптева, Н.В. Савина ос Р.М. Гаврильчик Москва үсн ялсыт

пормас такталанэ порат щāнь лātңыл наманыл лāвавет ос матыр ты урыл потыртэгыт.

Ты бовылтыт «Лылың сōюм» коланылт кина-охса пōслым блы, нāн ты лōпсыт сунсән: <https://youtu.be/-XjAJqcNOU>. Ань тамле пўмыщ вāрмаль сāvсыр мāныл ёхталам ханищтан хōтпатн сака мўстыс. Тāн бс акв тамле тэла щёпитаңкве таңхёгыт.

Любовь Захарова вāt нупыл ат арыгкем тāl школат рупиты, тав лāвыс, ань нйврамыт щāнь лātңыл ханищтанэтэ порат интерактивный пāрт тавён ёмас нётмил тоты. Тот пōслын утыт пуссын сус-сылтаңкве рōвёгыт, лātңыл кўпнитнувэг хансавет.

Галина Лаптева вāt арыгкем тāl рупиты, тав школа-интернатн ёхта-лан соссa āгирищит-пыг-рищитн сака нёты. Тав потрыт ос стихыт хансы, сургутский диалект ханты лāтың ханищтан нэпакыт щёпитас. Ты этпос нёлоловхуйплов хōтал Галина Павловна 55 тālэ тōвлыс. Мāн таве янытлылўв, пустāгыл вос блы, сāv щуниң, сōтың хōтал вос бньщи, пўмыщ потрыт, стихыт элалыт вос хансы.

Ты хурум нэкет нйврамытн эруптавет, рупатаныл мāгыс пўмащипа лātңыл лāвавет, тāн сāvсыр мōт мирытн бс вос вāвет.

Тамара МЕРОВА

Атям сәлыт пусмалтас

Ты хурит мәнщи нэг-хумыг Светлана Лазаревна Гындыбина ос Эдуард Анатольевич Хозумов пöслым блэг. Нэ сүкыр этпост 1973 тәлт Саранпәвилт самын патыс. Ома тэ Клавдия Михайловна Хатанева мәщтыр нэ блыс – пүркит, кентыт, мәнщи супыт юнтыс. Нән ань элаль Светлана Лазаревна потре ловиньтэлбн.

– Омам Ясунт пәвил-ныл блыс. Тав сәмыл охсарыт янмалтан фермат рүпитас. Юн акваг юнсхатас, пәля пун сәтапыл сәвсыр пормасыт сагыс. Аканит юнтуңке аном ханищтастэ. Ам ань вәңкрипыл (крючокыл) сагегум. Мәнщи суп юнтуңке номсэгум. Омам Прасковья увщитэ Зверофермаг ләвнэ мәт блыс, Люба эще Ясунтыт, Пётр каңке Саранпәвилт блыс. Тән ань пуссын атимыт.

Атям Лазар Михайлович Ромбандеев сәлыт пусмалтан хөтпаг рүпитас. Тав Салехард үст ветеринар-зоотехникыг ханищтахтас. Увщит бөньшас – Аксинья, Домна, Варвара ос Евдокия.

Хунь ам самын патсум, омам ам етум юн блыс, атям сәлыт пусмалтым нөрт яласас. Тувыл тав бвыл вәрыс, турманколн үнттувес, мән омаментыл менттемән хультсумән.

Төнт ам тәлум туп төвлыс. Ётыл омам мөт хум вәрыс, Пётр Егорович Гындыбин. Хүрум пыг бөньшигласыг – Саша, Коля ос Серёжа.

Китхуйплов тәлум яныт порат атям тәртвес, юв ёхталас, хоса ат блыс, агмыл хартыс. Омам бс тав юи-пәлэт атимыг ёмтыс, кит әпщиягум бс атимыг. Колям Новороссийск үст морфлотыт армият служитас, тувыл автомеханикыг ханищтахтас, ань Нягань үст рүпиты.

Ам школа әстләмум юи-пәлт, Хәльүст рүпитаңке патхатыгләлсум кос. Төнт әпщирещанум иң мәнит, атяныл ёт Кульпаст блсыт. Пётр яглаңум увщитән, Елена Егоровнан, Кульпасн вөввөсум, әпщиянум янмалтаңке вос нөтэгум. Тув та минасум.

Сәр ойкам Виталий Абрамович Гындыбин 2005 тәлт атимыг ёмтыс. Кит аги бөньшимән, Клава



Эдуард Анатольевич ос Светлана Лазаревна

ос Аня. Яныг агим хум вәрыс, ойкатэ Алексей Челданов Аня пәвилныл блы, кит агирищ бөньщег – Арина ос Полина. Мән агим Белоярский үс колледжит ханищтахты.

Эдуард Анатольевич ёт Кульпаст акван-блмыгтасмән. 2015 тәлт ам Саранпәвилт блнэ колыл майвөсум, тыг та вәнтлысүв.

Светлана Лазаревна ойкатэ Эдуард Анатольевич бөйттур этпост 1972 тәлт Кульпас пәвилт

самын патыс. Тав әпщи ос хүрум эщ бөньщи – Серёжа, Наташа, Света ос Таня. Оманыл Евдокия Ивановна школат сәвтәл ныврамыт ханищты рүпитас, «Ветеран труда» намыл майвес. Атяныл Анатолий Иванович Хозумов рыбучасткат бригадирыг рүпитас. Мәнтягыл сәвсыр рүпата вәрыс – хул алышлас, трактористыг блыс, Саранпәвилт ос Лопмуст рүпитас.

Эдуард Анатольевич



Лазар Михайлович сәлы үрнэ мәхум халт ёмаспал нупыл лөли



Светлана щар мән, сәнсыт үнлы, омаге-әтяге лөлө

тох потыртас:

– Атяв туре агмың Өлыс, лөккарыт лавсыт, «рак пищевода». Операциял вэрыглавес кос, ос агме алпи тйвырн минас. Нөх ат та вөрмхатас, 2015 талт хотталы шалтыс. Степан апшитэ 1999 талт атимыг өмтыс, тав колтаглы өт өс Кульпастан Өлыс.

– Наң школа асламын юи-палт элалы ханищтахтасын?

– 1989 талт Кульпастан лов класс аслам, Тюмень үсн ялсум, тот Сельскохозяйственный институтн экзаменит мисум, тув вуйвөсум. Акв талт туп ханищтахтасум, каникулын өхтысум, юв яртхатасум, Тюменин вөссыг ат минасум. Ань номсэгум, элалы ханищтахтукве эрыс, тыт ань рупататал өлэв.

Школат лаборантыг рупитасум, тувыл кочегаркат, рыбучасткат. Манытагыл самтерыл өлсум, өтыл, сүстөмт, татем лөльсаң касалаңкве патсум. Ханты-Мансийск үсн ялсум, тот самагум операциял вэрвөсбг, ань тай посыңыг өмтыс.

Саранпавылн ханышувласум, өвлөт ювле минуңкве номсысум, Кульпастан тай акваг хул алышласум, вөраясум. Тыт ань Алексей Яптин вөпсум ос Эдик Лешук өт өс вөтихал вөрн ялантэв, хул алышлэв.

Ты маныщи хум Ульяна Степановна Хозумова щаккватэ Хорыңпавыл нэ Өлыс, тав ань махманэ өлум мат та яласы. Светлана Лазаревнан ос Эдуард Анатольевичин сав өмас лэтың лавөгум. Ты ятил маныщи нэг-хумыг, сымың хөтпаг сав тал пүстөгыл вөс өлэг, Най-Отыранэн вөс үргалавөг!

**Светлана
РОМБАНДЕЕВА**

Матыр-ати пуссын вэри



Хальүс район Саранпавылт эргын-йквнэ махум халт сымың ос таксар хөтпа Өлы – Мария Алексеевна Бабилова. Тав саран колтагыл самын патыс, сав тал «Асья кы» (Алпыл сэрипос) ансамблит саран эргыт эрги.

1998 талт Мария Алексеевна самаге постөлыг өмтыс, такос пүсмалтахтас, лөккарытн нөтуңкве ат вөрмүвөс, тоха та самылытөлыг өмтыс. Элалы өлуңкве Мария Алексеевна йильпииг ханищтахтас – колсори рупата, тэнут пөйтнэ тэла, та маныр, пуссын такви вэруңкве патыс. Нан ань элалы тав потре ловиньтэлы.

– Опагум-ашөйкагум Саранпавылн нөр тапалныл өхтысбг. Ашөйкак Алексей Григорьевич Артеев 1879 талт Печорский район Кожва пөвылт самын патыс. 1912 талт Өвыл яныг хөнтын вуйлувөс. 1918 талт юв өхтыс, колтагыл махманэ пуссын тэтөл атимыг өмтыт. Тувыл тав Сибиря-

ковский тракт лөңх хөсыт яласан махум өт Сүкырья пөвылт мус өхтактас. Анөквөм өт тыт акван-хөнтхатсыбг. Омам Фаина Алексеевна Сүкырьят самын патыс, ам өс тот самын патсум лүпта өтпост 1955 талт. Кит апши өщсум, Василий ос Геннадий, ань сас атимыг.

Ойкак наме Николай Михайлович, тав омагөнтагыен Саранпавылн маны порат тотвөс. Тыт акв школат ханищтахтасмөн, тувыл акван-минасмөн. Пыг ос кит аги Өныцимөн. Агиягмөн сас маны лөккарыг ханищтахтасбг, яныг агимөн Хальүс пүльницат реанимация отделения рупиты, мөтагимөн Саранпавыл пүльницан патхатас. Пыгмөн өс тыт Өлы, най харыгтан мат рупиты.

Хунь нөвраманум мощ яныгмасыт, пүңкум акваг та агмың. 1998 талт самагум щар туп ты постуңкве патсыбг. Ойкак өт Ханты-Мансийск үсн ялсүмөн, лөккарытн сүсвөсум, лавөгыт, операция вэруңкве эри. Тюмень үсн көтвөсум, тот операциял вэрвөсум. Ос самагум посыңыг тох ат та өмтыс, та пөсныл нөматыр ат касалэгум.

Усың маныл юв өхтысамөн, омам төнт иң Өлыс, тав лэлытэ лавөгум: «Матыр-ати ам амти вэруңкве патэгум, лэгыл-көт Өныщөгум, хумус нас үнлэгум». Колкан ловтнэ төр ос вөтра висум, вит пинсум, колкан ловтуңкве та патсум. Нөвраманум лавөгыт: «Ома, вөссыг ты ати, сакати лылыңтагыл өлэгын. Самагын магыс номтын ул вөс савалы, мөн пуссын ляпат өлэв, наңн нөтуңкве патэв».

Ойкакн өс акваг нөтавөм. Ансамблит эргын кастыл, эргыт ойкак өт ханищтымөн, тав ловиньтыяна, ам тувыл пуссын номтыт Өныщиянум. Мөн саран эргыт эргөв, «Эргын сым» ансамбль махум ос маныщи эргыт эргөгыт. Вертолөтыл, машинал мөт пөвлытн ялантэв, тот выступайтэв. Саран супанув масэв, маныщи махманув ос танти маснутыл эргөгыт.

Мария Алексеевна сымың, потрың элумхөлас, каркам нэ. Эмас номтыл потрами, мөвиньты, сома хөтпа нупыл самагөтыл сунсы. Ты ятил саран нөкве сав тал пүстөгыл вөс Өлы! Нөвраманэн, ойкактэн, рүт махманэн вөс нөтавө!

**Светлана
РОМБАНДЕЕВА**

Ялпың мәнэ ўргалым Өньщиянэ

Ягрим пәвылт мәнщи хум Өлы, наме Виктор Константинович Костин. Тав Алыпәвылт (рущ щирыл Комудваны) самын патыс. Хум ләви, 1985 тәлт Ягримн Өлуңкве минас.

Аятэ Константин Иванович Костин ос оматэ Анна Ефимовна нёлолов нйврам янмалтасыг. Ты пыгён ати щар юи-өвыл нйврамыг Өлыс. Ань тав тактёт хультыс. Аятэ хөнтлын мән вуйлувес, тот война оигпан мус яласас.

Өвлэт Ленинград ўс вуянтасыт, тувыл Польша нупыл миναςыт, та мә хот-вуянтасаныл. Кенигсберг крепостит хөнтлыс ос Берлин мус яныгсәт вёрыста хультсас, Одарят тот та война пөйтум урыл хўлсаныл. Мёталянэ пыгён ань пуссын ўргалым Өньщавет.

Константин Иванович Костин тамле мёталит Өньщас – Орден Красной Звезды, За отвагу, За боевые заслуги, Отличный пулеметчик. Хум гвардии

младший сержант, пулеметный расчет командирог Өлыс. Нэматарыл ат пилыс, фронтовой разведчикыг фашистыт Өлум мән ялантас, тот Өлнэ вәрмалит сытамыг сунсыглас ос такви командираннэ потыртас. Офицерыт таве «Пилтәл мәнщииг» ләвсаныл.

Тав карсыг ат тёпыл Өлыс ос ёр Өньщас

Хөнт Өвылтахтам порат тав колхост председателиг рўпитас. Та порат Алыпәвылт Ленин нампа колхос Өлыс, Ялпуст – Сталин нампа, Посалтыт пәвылт – Фрунзе нампа колхос. Война юи-пәлт хўл алыщлас, вёрт вөр ўйхул катын-патталас. Хўл алыщлан мәхум пиркәтат пиркатирыг Өлыс. Тувыл Перегребный пә-



В.К. Костин

вылт связь мәт монтерыг рўпитас.

Яныгмам мәтэ

Виктор Константинович ань ләви, тав Алыпәвылт мә такви нупылэ хансыстэ, ань тот тав алыщлан мәтэ Өлы. Тот воссyg нэмхотыют тәлэ-тувёт ат Өлы, рўтаныл ёт пентхатым тув ёхталэгыт, хотыют ущлахтын порат, хотыют отпускын ёхталэгыт. Хум такви тув вәтихал яланты,

матпалыт тот Өлы. Тот Өлнэ кол, пувлынкол, туй порат тэнут вәрнэ пәрткол ос мөт эрнэ ампарыт рўтанэ ёт ўнттысыт. Пўрлахтын мәныл тав ты уральтым Өньщитэ, мәхманэ ханищтыянэ, суссылтыянэ, матыр эрнэ вәрмаль вәруңкве вос хәсэгыт.

Төва порат матыр ўйхул ёвтэгыт, йирхатэгыт. Ягримныл тув яласан лёңхе сака хосаг Өлы.



К.И. Костин (әтәтэ)



А.Е. Костина (оматэ)



Владимир Костин (каңке)



С.А. Попован Уй ййквнэ урыл титыглавес



В.К. Костин

Перегребный павыл мус атпан нупыл тит вёрыста, тувыл Өс аквты савит вёрыста тэлы лёңх хосыт минуңкве эри.

Маньщи хумләви, Ягрим павылт щёмьятэ Өлы, экватэ Вера Алексеевна руц нэ, тэн экватэнтыл акв аги Эльмира янмалтасы. Агитэн тит няврам Өньщи, агииг-пыгыг. Пыге нёлоловит классыт, агитэ титыт тал ханищтахты.

Такви ханищтахтаме урыл

Виктор Перегребный павылт нёлолов класс аслас ос Ханты-Мансийск үсн минас, тот хурум тал охсатем речной училищат капитан старший помощникыг ханищтахтас. Лави, сака ёмщакв аслас, пуссын нила ос ат оценка Өньщас. Тот ханищтахтуңкве тавён пумыщ Өлыс, морской формал акваг ёмыгтасыт, армия хольт Өщвёсыт.

Та юи-палт армиян вуйвес, Дальний Восток мат Китайский граница мус 15 вёрыстат лусытан маныл Өлыс, тит тал ос нила этпос тот Өщвес. Та порат Леонид Брежнев атимыг ёмтыс, тән, юв атхатам пыгыт, Өс матсә-

витын тот хультуптавёсыт, границав иң нила этпос үргаласаныл. Ос рётың юсвой этпост уцта юв ёхтыс.

Юн Перегребный ос Чемаши павлыгт рупата тинсыс, нэмхот ат виве, тав катерыл яласан диплом Өньщас. Ягримн ёхтыс, тара тот «Главсиб-трубопроводстрой» организациян нәиңхәпыл яласаңкве вуйвес, лавёгыт, маньщи кос, ос татем ёмас диплом-нәпак та Өщнэтэ.

Тав рупататэ сака ёмщакв вәрыстэ, катере нас вольгыс, акваг ловтым, сыстамтым рупитасыт. Ётыл та организация мот щирыл намаявес – «Игримречтранс». Тав та элы-палт тувыл мот рупатан минас, экватэ агмыл хартуңкве патыс, юн таве уральтым Өлуңкве эрыс.

Тох тав пенсиян патхатнэ мус иң лов тал ЖКХ колт күр палтыглан мат слесариг рупитас, хот маныр саквалы – тав хотщёпитасанэ.

Ягәгиянэ-ягпыганэ урыл хум тохты потыртас. – Мән яныг увциюв Нина 1946 талт самын патыс, атяв войнаныл юв

ёхтуме юи-палт. Та увциюв иң маниг Өлме порат Өвыл ёмтыс, пум вәрнэ мат нәй нөх-пёламлас, хасап тивырт тот та атимыг ёмтыс. Тав ёлы-палэ тит каңкагув Өс мань порат атимыг ёмтсыг. Сантыр каңкум 1948 талт самын патыс, Владимир – 1952 талт, Валерий – 1956 талт, тувыл ам 1961 талт, ос ам ёлы-палапшцим 1963 талт самын патыс. Ань ам щёмьявныл амтем хультсум.

Ам маньлат порат сака нёмса Өлсум, хунь эквам Өвыл щёс кәсаласлум, тав тамле нётнэ выгыр атуп, воцрам сампа аги, номсәлэгум: «Хумус ам тав ётэ потыртаңкве Өвылтахтэгум?». Титактем тал тав ляпатэт минлахтасум, тувыл уцта акваг-минуңкве кәсащас. Хум мовиньтым потыртас, пуссын Өщатахтыгласыт, хумус ам тамле нётнэ нән ляпан вуйвёсум.

Маньщи ләтҗе урыл

Виктор Константинович маньщи ләтҗе ос омаге-әтяге урыл тох лавыс: «Мән юн омагув-әтягув ос халувт туп маньщи ләтҗыл потыртасу. Ос хунь руцит мән палтув ёхталасыт, тонт

туп руц ләтҗыл потыртасу, тох тай туп манти ләтҗувтыл. Тохтэн манавн акваг лавсасыг.

Армият хунь госпитальн пинвёсум, татем маньщи ләтҗыл потыртаңкве таңхөгум, нэмхотыют ёт, амтирот ёмыгтым маньщи ләтҗыл та потыртэгум, махум ам нупылум нас та сунсэгыт, аман хумус ам потыртэгум. Актуп руц кос, ос маныр ләтҗыл тав потыртыс.

Ам таве Уй ййквнэ урыл Өс титыгласлум, тав лавыс, юи-Өвыл щёс 1977 талт Уй ййкв вәстэ, тонт тавён 15 тал Өлыс, ёмщакв номитэ. Пуссын маньщи махум Өлсыт, пөх хотпа щар атим Өлыс. Тулыглапыт тулыгласыт, тасавит Өщхуль, мовиньт Өлыс. Пуссын яныг махум ос няврамыт ты кастыл щёпитахтасыт, Өщхуль вәрсыт.

Ты элы-палт тамле мән ат ликмаләлыс, тэлы порат вәрыглаве, тән, няврамыт, интернатт ханищтахтасыт.

Омаге-әтяге ёт Ялпуст ос Алыпавылт пурлахтын мән акваг ялантасыт, тән ты вәрмаль вәңкве ханищтавёсыт, тәнти Өс вос хәссыт. Тув щицкुरек манос маньмис, пәля, нёвыр йирыг туцтуңкве тотыгласыт. Тотнэ уйхулыт пуссын хум уйхулыт вос Өлсыт.

Ань такви яланты, рутанэ ёт тотыглы, хотты уйхул алыгләгыт, пурлахтэгыт. Ты урыл пөх хотпатын ос руцитын мори ат потыртэгыт. Яныг ялпың ма хот ат оссувляяныл, үргалым ос уральтым Өньщияныл, Нәй-Отыраныл пөйкщияныл.

Галина КОНДИНА
Р. Бардина тётум хурит

Вөраян мәнъләт пыг



Евгений Анямов, 2016 тәл

Хальүс район Түрвәт пәвилт Уй
ййквнэ вәрмалын Свердловский
область Ивдельский район Ушма
пәвилнл мәнъләт мәнъщи пыг Евгений
Юрьевич Анямов ёхталас.

Ань ты порат тав вәт нупыл кит тәлэ төвлыс. Тав анузн такви олупсатэ урыл моц потыртас.

Лүсум мәнъщи хөтпат пәс йис олупса щирыл олэгыт. Тәнки олнэ-хүлнэ наканыл ат ёрувляяныл, акваг элалъ тотыяныл. Тот олнэ нъяврамыт щәнъ ләтңыл мәнътәгыл потыртэгыт. Щәнъянылн, ащанылн, щәщәкванылн, анёкванылн ханищтавет, халанылт мәнъщи ләтңыл потыртэгыт.

Евгений 1998 тәлт Кёрасколыңъя пәвилт самын патыс. Ащә руц хөтпа олыс, тав хосат атимыг ёмтыс. Щәнә ос наме Татьяна Владимировна Анямова, тав ань Лэпла пәвилт олы. Тот

хум Николай тәккет олы. Воссыг нәмхотыют атим. Хумыг тәлэ-тувет вөраим яласэг.

Евгений Кёрасколыңъя пәвилт яныгмас. Пыг сәт тәлэ төвлыс, Полуночный пәвилт школа-интернатын ханищтахтуңке тотвес. Тот нёлолов класс мус ханищтахтас. Тувыл та интернат лап-пантвес. Нъяврамыт пуссын Серов үс школа-интернатын элалъ ханищтахтуңке кётвёсыт. Евгений тот онтолов класс әстлас.

Школа әстламе юи-пәлт элалъ мәшинал яласан хөтпаг ханищтахтуңке патхатас. Ханищтахтын мәныл астыс, ос экзаменыт миңке ат вёрмысанэ, такви пәвлән та минас. Тот моц олыс, пыг армиян тотвес.

Мәнъщи пыг Магнитогорск ос Самара кит үсыг халт связистыг лусытым яласас. Мә ёлы-пәлт бункерт үнлыс. Тот яныг планшет олыс. Та планшет хосыт сунсыс, хумус товлыңхәпыт нумипәлыл тыламлэгыт.

Товлыңхәп акв кум миннэтә юи-пәлт, тавә ёл-хассаныл. Хоталь мины, та ләңх акваг сунсыс оцсаныл. Женя армият акв тәл лусытас.



Ушма пәвилт, 2016 тәл

Тувыл элалъ мәныр вәруңке ос хоталь минуңке, тав лусытам мәтәт ёмцакв номсахтас. Тавән вөрн сака таххатас. Тымәгыс армияныл тәра юв минас. Тот ань тыг мус вөраим ты яласы.

Аквматнакт Кёрасколыңъя пәвилт ляпат яныг нәй тәс. Төнт төва колыт нәйн ёсвёсыт. Төнт ты сәвыңпәлэ мәхум Ушма пәвилн олүңке вәнтлысыт. Тот сосса мәхум мәгыс йильпи колыт үнтувёсыт.

Пыг Альбина Александровна Анямова анёкватә ёт Ушма пәвилн вәнтлысыг. Ань нила тәлыг ёмтыс, тот олэг. Евгений такви тот кол оц оныңи кос, ос ань анёкватә яңыгпәлаг ёмтыс, тавән нётым олы. Ульйив щәпиты, вит тоты ос мөт колсөри рупата вәри.

Анёкватән янмалтавес

Пыг мәнътәгыл анёкватән янмалтавес, щәнъ ләтңә ёмцакв вәгтә. Нёр ляпат вөркол оныңи. Туи порат тот ләглыл ёмыгыт, тәлы ос «Бураныл» тув яланты. Таквсы пораг ёмты, кёрнялит үнтталы. Рётың юсвой этпос мус атхуйплов сәвиткем нёхыс пувыс. Тувыл сөрүп ос вөр сәлы моц алыгыл.

Евгений ләвме щирыл, ань ты накт вөрүй моцшаг ёмтуңке патыс. Сака сәв хөтпа вөраим яласэгыт. Лүсум ят хүл оц моцша хультыс, туп тәнә сәвит пувёгыт. Матыр кәтын-паттын мәгыс элы мән ялантэгыт. Тох ты лүсум мәхманув ләщәл олэгыт. Та олнә мәныл тән воссыг нәмхотталъ минуңке ат кәсәщәгыт.

Николай МЕРОВ

Пумыщ ханищтапыт

Ань ты йист округт олнэ мэхманув савсыр проекттыт щёпитэгыт, савсыр мән касуңкве кётыяныл ос тувыл нөх-патэгыт. Югорск үст олнэ нэпак ловиньтан ос пёс накыт Элаль тотнэ «Элегия» нампа колнак рүпиты. Тот савсыр проекттыт Наталья Викторовна Анкина щёпиты.



Л.П. Волкова



Д.И. Белова

2019 талт тән Президентский фонд палныл «ЭтноМирЮгры» проектаныл магыс олныл тастыглавёсыт. Ос 2020 талт тән «Мульти-Югра» мән кинат пöслын касыланыл ёт нөх-патсыт.

Манхурип ханищтапыт, суссылтапыт щёпиталвёсыт ос хоталь мэхум касуңкве вöвавет, пуссын ты öвылтыт **Наталья Анкина** потыртас.

Югорск үст олнэ нэпак ловиньтан ос пёс накыт Элаль тотнэ «Элегия» нампа колнакн сав мэхум ёхталэгыт. Та мүй хөтпат пуссын савсыр

мирныл öлэгыт ос тәнки халанылт вайхатэгыт, ос мираныл öвылтыт матыр ханищтапыт щёпитэгыт ос мөт мэхумн суссылтыяныл.

Мöлтэ тал сыс тән сав щёс акван-атхатыгласыт ос белорусыт, киркызыт, марийцыт, удмуртыт, таджикыт, украинцыт ёт вайхатасыт. Ты мирыт тәнки савсыр пёс наканыл, маснутаныл суссылтасыт, потраныл ос мөйтаныл хунтлувёсыт, тән тәнки щань латңыл эргысыт ос мүй мэхум ййквуңкве

ханищтасаныл. Тамле пумыщ вәрмалитн нёлсәткем элумхөлас мүйлуңкве ёхталасыт.

Мүй мэхум магыс хури пöслын касылыт щёпиталвёсыт. Тот хотты мирныл öлнэ хөтпат щёмьяң тагыл манос юртаныл ёт аквёт пуңкын пиннэ кёнтыл пöслахтасыт. Ань тув нэ ос хум хөтпат пуңкын пиннэ 20 сыресыр кёнтыт ос төрыт атвёсыт. Тамле пормасыт РФ Президентский грант маим олнытыл ёвтвёсыт.

Ань ты колнакт пуссын вәрнэ тэланыл вәңкве, ляххаланыл ловиньтаңкве манос пöслум мән кинаныл сунсуңкве тахмаегын ке, нән тән лөпсанылт кисхатуңкве вөрмегын: <http://bibl-ugorsk.ru/elegy/>

Мәнщи мэхум пёс наканыл пумщалан магыс ос сыресыр проекттыт элаль тотнэ порат Югорск үст öлнэ нёт вöвиньталавет.

Людмила Волкова тав мөт мирыт элы-палт пёс наканув öвылтыт

потыртас, суссылтап щёпиталыс, тувыл такви сәңквылтаңкве ханищтахтас, ань ос ты тэлатыл мэхум пумщалы.

Дарья Белова ос сыресыр пормасыт мащтырлан ханищтапыт щёпиталы, ныврамыт ёт аканит юнтэгыт ос та сыс потырт, мөйтыт ловиньтэгыт.

2020 талт тән матумпала хөтпатётакван-атхатуңкве сака ат вөрмысыт. Төнт тән ищхыпың ут хосыт мән кинат пöслуңкве патсыт. «Читаем семейные сказки» нампа проект щёпитасыт. Та щирыл мәнщи эква **Нина Гавриловна Рукова** такви хансум мөйтэ «Женщина-огонь» мультфильм хольт пöслувес ос мэхумн тот суссылтаветс.

Тот ань касың хөтпа такви магыслэ матыр пумщалан вәрмаль хөнтуңкве вөрми. Тувыл үст мүйлын хөтпат та нэпак ловиньтан колн восщалтсэгыт, хотты ёмас хөтпат ёт вайхатэгыт.

Тамара МЕРОВА



Югорск үст öлнэ савсыр мирыт

Хум лāвыс – тўяг вāс пāтлуптаңкв ат рōви



Мā-витув ўргалан мāгыс округувт сāvсыр колыт рўпитэгыт. «Самаровский чугас» нампа кол Ханты-Мансийск ўст 20 тāl рўпиты. Тот сāv хōтпа мā-витув ўргалан щирыл янас рўпата вāрēгыт.



А.В. Бочков

Акв хум **Александр Витальевич Бочков** тот ѓс сāv тāl рўпиты, тав руц лātңыл лāваве-орнитолог. Ты хōтпат мāн мāvт ѓлнэ ос тыг ѓхталан товлың ўит ос ўйрищит ханищ-тыяныл, уральтыяныл ос ловиньтыяныл. Тав такви рўпататэ урыл ляххал тотнэ мāхумн тох потыр-тас.

Тав лāвыс, ты вāрнэ рўпататэ сака эруптытэ. Кāсың тāl Россия янытыл мощцаг хультум ос мирн ўргалан матхурип товлың ўй намыл намаяве. Мōлты 2020 тāl Тāрыг янытлан тāлыг ѓлыс.

Ты 2021 тāl ос мōт тов-лың ўй намыл пинвес. Тав руц лātңыл тох лāваве – кобчик, мāньщи лātңыл ос – хōртхан. Хōртханит ѓс сāvсырыт, тōват лēганыл сэмлыт – ты хōртханит, тōваныл лēганыл яңкыт – ты ос тўрвоит.

Александр Витальевич мā-вит ўргалан тэла урыл татем сымыңыщ потыртас, потре щирыл тāра нāңки – рўпататэ сака янытлытэ ос товлың ўит ос ўйрищит мāгсыл сьме сака щāрги. Хум лāвыс:

– Тўяг мōртым мāныл мāн мāvн ос округув тāра сāv товлың ўит ос ўйрищит тыламлэгыт. Тāн тыг ѓхтэгыт, ос тыт вāс пāтлуптан пора та ѓвыл-тахты. Лўи мāv мус туп



ѓр ўит ѓхтэгыт. Манах сōтыра вēрыста тāн ты-ламласыт ос тыт та пāт-луптавет. Тыимāгыс ам номтум сака лўль. Ам тох лāвэгум, тўяг вāсыт, лунтыт пāтлуптаңкв щар ат рōви. Таквсы тай рōви, таквсы мус тāн сāvмēгыт. Ос рēгың мāн тыламла-нāныл порат лēңхыт ѓс сāv товлың ўй порсы.

Рўпитан коланылт тāн музей колнак ѓньщēгыт. Тот тасāвит ўйрищ питит акван-атманыл. Хум титыглавес, ты вōрт хōн-тым питит тув вāрсаныл манос тāн тāнти вāрум питияныл.

Александр Бочков ювле лāвыс, тāн вōрн акваг ялантэгыт, ўс мувлахи вōрув уральтыяныл, ўйрищит тыттын хусапыт сāvсыр мātт ййвн нōхтагатыяныл. Ўйрищитн рōвнэ тэнут тув пинэгыт, ты щирыл мощ тыттыяныл. Ўс ляпат ѓлнэ ўйрищит элмхōлас палт тув мус та ханьщувласыт, хōтпа роттыг те лўли,

тāн кātн исэгыт, щар ат пилэгыт.

Ты хум Рязань ўс ляпат ѓлнэ заказникыт рўпитас, тувыл тав Ханты-Мансийск ўсн рўпитаңкв ѓхтыс. Тот рўпитаге порат тāн мортым мāныл ѓхтын вāсыт мāгыс пāртныл хусапыт вāрсыт, ос ят, тўрыт ляпат ййвн нōхтагата-тāлсаныл.

Ань тыт Ханты-Мансийск ўст тав акваѓт рўпитан мāхманэ ѓт тамле хусап-колыт ѓс вāрēгыт, тāн руц лātңыл тох лāвавет – дулянкат. Хусахтем мēтра карсыт ййвн, мāныл аква-тит метра вос ѓлы, тув тагатыяныл.

Ўринэкват урыл хум потыртас, тāн мōт товлың ўй питит хуйнэ мўңитн сака новхатэгыт. Ос вāс манос мōт ўй питит ўнлы те, тāн сāv ўринэкват аква-атхатым та вāс хот-нявлыяныл ос мўңит аква-вал-аквал тўлмантыяныл. Ань учēный мāхум лāвэгыт, ўринэкват мōттовлың ўит халт щар мāk номтың ўиг ты лāвавет.

Кāсың товлың ўй ос ўйрищ урыл ты орнитолог-хум сāv потыртаңкв вēрми. Ос тав ань лāвыс, мā-витув акваг уральтаңкв эри, мāн ѓранув хосыт вōранув сыстамыг вос хультэгыт, тот ѓлнэ вōруит, товлың ўит, ўйрищит вос сāvмēгыт.

Валентина
ВАСИЛЬЕВА

**Вāсыт
мāгыс
тамле
хусапыт
вāрēгыт**




Мән яныг үсувт пёс нэпакыт акван-атнэ окружной архив-колт пумыщ выставка суссылтаве, руц латңыл тох лававе – «Дадим больше рыбы Родине».

Хул алышлан арталит урыл хансым сав пёс нэпакыт ань архив колт оныцавет, тот пуңкотнэ маныщи хум хотпат наманыл хансымат. Хоты павлың махум план молях товартасыт, хотьютаныл нбх-патыс, тот пуссын хансым олы.

Самарово павылт (пёс порат Ханты-Мансийск ус тох лаввес) хулыт мот тэнутыг щёпитан магыс сав колыт 1930 талт унтувёсыт. Тонт Самароват олум махум пуссын тув рупитаңкв тетвёсыт.

Колыт унттын хотпат ёмас саграп ман йив сартнэ тер сака хунь ошсыт. Яныг норыт ворныл катыл харттысаныл. Хотмус тох та колыт унттысаныл – консерва

Хул сахныл мойтак ос элюм пайтсыт



варнэ кол, панкат лап-пантнэ кол, тер толтнэ кузница ос йив тотапыт варнэ кол.

Овлэт консерва панкат тан супыгхулныл варсыт. Та порат Ас ос Иртыш ягт сака сав супыгхул олыс, ляпат унлын мән павлың хум хотпат тан хул алышласыт. Рыбокомбинат колыт унттум махум пуссын хул мот тэнутыг щёпитан колн рупитаңкв ос вуйвёсыт.

1931 талт титсат хотпа тот рупитас, мотыт 1932 талт - атсат хотпа, та юи-пал талыт – акв сотыратем хотпа. Та махум халт савыңпалэ мот маныл тетым хотпат, спецпереселенцыт, рупитасыт.

Овлэт тан ханищта-вёсыт, тувыл уц хулныл савсыр мот тэнут варсыт. Хул сахытныл, соргытныл мойтак ос элюм

пайтсыт. Тованыл хул пувуңкв ханищта-вёсыт, мотаныт ос хул яктысыт, солвалтасыт, саритасыт. Хултвёсыт, хумус панкан хул пинуңкв эри. Та юи-палт тан уральта-вёсыт, ты рупата тан варуңкв ёмашакв хасёгыт ман ати.

Яныг хонт овылтахан элы-палт куцаит пуссын лаввёсыт, тан маныщи ос ханты хотпат колхозн ос вос выганыл. Та юи-палт округув янытыл мән павлың матт хул алышлан сав арталит варвёсыт. 1939 талт 313 колхозыт хул пувим рупитасыт. Ос 1943 акв талт сис хонтлыл мән 501 сотыра хул панка тетвес.

1944 талт округув янытыл туп 90 сотыра элмхолас олыс. Тан халаныл 22 сотыра хотпа хул алышласыт, 14 сотыра – ты нэквет нэвраманыл эт рупитасыт. Тан ущпыл-нэг сав хул вос пувёгыт,

савсыр металил ос олныл майлувёсыт.

Хул алышлан махум халт сав хотпа «За доблестный труд в Великой Отечественной войне» ос «Герой социалистического труда» металил янытла-вёсыт. Щар сав хул пувум арталит олныл нётвёсыт. Война олум нила талт сис мән округувт 940 сотыра центнер хул пуввес.

Тох ты мән мавт хул пувнэ махум рупитасыт. Ань ты йист Хальуст рыбокомбинат лап-пант-вес, витыг тотвес. Сургут уст 1942 талт пасныл ань ты хоттал мус рупиты. Ханты-Мансийский рыбокомбинат ос ёмашакв рупиты, акв талт сис 120 тонна хул пувёгыт, савсыр тэнутыг варияныл ос хот-ати тыналыяныл.

Валентина ХОЗУМОВА

Лүймә сәрипос
(Северная зоря)
№6 (1240), 25.03.2021
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Врио директора, гл. редактор –
Кондина Г.Р.
Телефон (3467) 33-36-82
Заместитель гл. редактора –
Кондина Г.Р.
Телефон (3467) 33-36-82
Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52
E-mail: gazeta@khanty-yasang.ru
Газета размещена на сайте
www.khanty-yasang.ru
Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399
Тираж 1710 экз.
Заказ 1114
Цена свободная
Мнение авторов
публикаций не
обязательно отражает
точку зрения редакции.
Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.
Свидетельство
о регистрации
ПИ №ТУ 72-00795
от 23 января 2013 г.

«Мәк нётнэ аги» нампа спектакль суссылтаве

«Хотал» нампа театр ӧс акв йильпи спектакль щёпитасыт. Мәньполь этпост нэ хӧтпат ялпың хӧталаныл кастыл Ханты-Мансийск үст ӧлнэ мәхум мәгыс «Мәк нётнэ аги» нампа пьеса суссылтасыт.

Ты спектакль Мартин Макдонах хансум потре щирыл вәрвес. Мӧлты тәлытт ты театрыт рӯпитан артистат «Калека с острова Инишмаан» тав потре щирыл ӧс спектакль вәрыгласыт. Мартин Макдонах Лондон үс Англия мәт ӧлы, сәв мырытн кина пӧслын хумыг вәве.

Мән палтув «Мәк нётнэ аги» пьеса Михаил Али-Хусейн режиссёр-хумн щёпитавес. Тав акв ӧлыглаттәл пӯмыщнак ӧньщи – спектакль янытэт мәньщи ләтңыл потыртэгыт.

Тот «нётнэ аги» Вера Кондратьева ёнгитэ. Вера Сургутский район Лянтор үсныл ӧлы, та ёрт ӧлнэ ханты мәхум ләтңыл потырты.

Тот кит нэг ӧлупсатән суссылтаве, хумус матум щәнъ яныг агитән-тыл ӧлэг, тӧванакт сака халмалтахтэг ос таимәгыс акваг савалэг. Ты спектакль хумус вәруңкве патвес ос Вера ты ӧвылтыт тох ләвыс:

– Ты рӯпатав мән мӧлты тәл мәнь таквс этпост ӧвылтаслүв. Ӗвлэт хӯрум сәт сыс мән театрыт акван-хӧнтхатыгләлсүв, тот аквьёт рӯпитым тәлат вәрсүв. Ос корона-вирус ағм паттат лап-пантвесүв, режиссёрув ювле Москван минас, мән ос пуссын юв кётвесүв.

Ань та пәсыл ам мәньщи ләтңыл хансым потрыт амки ханищтаңкве та патсанум. Ты пьеса мәньщи ләтңыл Светлана Динисламован толмаш-



С. Хозумов ос В. Важенин

лавес. Тав аңум мәньщи ләтңыт ёмщакв ләвуңкв ханищтастэ.

Нән тӧва суянын, сӧль, мӧт щирыл ләвиянбн. Мән ханты ләтңувт тӧва суит нәнан ӧс хаштәлыг ӧлэгыт, манос щар мӧт щирыл ләгалавет. Ань ләтңыт акван ул вос тәлыгтыяnum, Светлана Селивёрстовна аңумн сәв нётыс. Ам ётум спектаклит ёнгын пыгытн моц кӯпнитнувөг ӧлыс, тән пуссын мәньщит, щәнъ ләтың вәнэ мәхум халт яныгмасыт.

Мән рётың юсвой этпос хус хӧталт пуссын акван-хӧнтхатсүв ос мәнь-

поль этпос атыт хӧталэ мус кәсың хӧтал ты потыр-охсат ханищтым рӯпитасүв. Тӧванакт ты кос кәсмостәлыг патыгләгум, хурахлым номсэгум – тасәвит потрыт аман хумус ханищтыяnum. Тувыл лӧль номтанув пӧхан-лаквтыяnum ос ёмас сымыл элалэ ӧлсум. Амки мәгсылум тәк номт висум, пуссын ёмасыг ёмты тах.

Ты элы-пәлт ам ныврамагум ёт «Невероятные приключения Ерофея Анямова» спектакльн ялсум. Тот тӧва мәт артистат ӧс мәньщи ләтңыл потыртасыт.

Ам ләтың вәнэ тәл суссылтан вәрмалит торгамтасанум, ты артистат мәщтырыг ёнгёгыт, щар эрнэ мәт хӧт моваләлым, хӧт лӧньщалтахтым манос хот-рохтуптахтым матыр ләгалэгыт. Мән ань аква щирыл ӧс ты ёнгысүв.

Ты спектакльт Саран-пәвилныл ӧлнэ мәньлат хумыт Вадим Важенин, Сергей Хозумов ос Иван Гындыбин ёнгысыт. Мӧт мәхумн ләвнэ потрыт вос торгамтавёсыт, тән руц ләтңыл пәрт тармыл хасвёсыт.



В. Важенин



В. Кондратьева



И. Гындыбин

Тамара МЕРОВА